



INATSISARTUNI

Partii Inuit
Randi Broberg

UPA 2014/126-1
25.3.2014

Pillugu siunnersuut: **Suliffeqarnermi innersuussisarneq il.il. pillugit Inatsisartut inatsisaat nr. xx, xx 2014-imeersoq.**

(Inuussutissarsiornermut Aatsitassanullu Naalakkersuisoq)

Inatsisissatut siunnersuut pillugu Partii Inuit makkuninnga oqaaseqaateqassaaq:

1.

Partii Inuit maluginiarparput, pisortatigut suliffissarsiuussisarneq pillugu siunnersuut, suliffissaaleqineq pillugu pimoorussamik iliuuseqarnissamik ujartuinerunngimmat. Taamalu Inatsisartut peqqussutaat 2004' meersoq erseqqissaaviginiarlugu annikitsumik allanngineq pineqarmat – 2013' imiit sullissinermi periuseq atorneqalereersimasoq maleruaqqusatigut toqqammavissinniarlugu.

Siunnersuutip pingaarnertut imarisai, tassa § 7. Immikkoortut 1. aamma Imm. 2. pineqarlutik.

2.

Partii Inuit maluginiarparputtaaq inatsisip nutarteriffigineqartup siunertarimmagu sulinermit atasumik nunaqavissut piginnaasatigut qaffassarnissaat, taamalu tikisitanik sulisoqarnerup annikillisaavigineqarnissaa.

Taamaattumik erseqqippoq, una allannguutissatut siunnersuut suliffissarsiuussisarnermuinnaq samminngimmat, aammali avataaniit suliaartortut killilersimaarneqarnissaat pillugu aaliangersakkanut attuumassuteqarmat (tak. inatsit nr. 27, 30.10.1992' imeersoq).

Inatsimmullu qulaani taaneqartumut atasumik nalunaarummi ingerlatseqatigiiffiit nalunaarsukkaminik naalakkersuisumut susassaartumut apuussisarnissaannik pisussaaffimmuut una allannguut aamma attuumassuteqarluni (tak. nalunaarut nr. 20, 19.11.2007' imeersoq).

Allannguutissatut siunnersuutip kalluagaa avaqqukkuminaatsoq taasariaqartorlu tassaavoq inuutissarsiutinik ilinniartitsinerit pikkorissaanerillu pillugit inatsit (tak. inatsit nr. 10, 19.5.2010' meersoq).

Immikkut taasariaqarpoq, allannguutissatut siunnersuut suliniutini angisuuni illuliortiternernik sanaartornernillu suliaasat pillugit aaliangersakkamut annertuumik attuumassuteqarmat (tak. inatsit nr. 20, 19.11.2007' imeersoq).



INATSISARTUNI

Minnerunngitsumillu attuumassuteqarluni pisortat sinnerlugit suliariumannittussarsiuussisarneq pillugu inatsimmut (tak. inatsit nr. 11, 2.12.2009' meersoq).

3.

Qulaani taaneqartut aallaavigalugit Partii Inuit toqqissisimanartinnngilarput ernumanartillutigulu assut, 1979'imi Namminersornerulerattali ataatsimut isiginnilluni suliniartoqarsimannginnera. Taamalu sukut tamaana aaliangersagaareersunik aaqqiissuteqalaartarnerit, ullorlu manna tikillugu uagut inuit soqutigisagut tunulliullugit naalackersuinikkut inuiaqatigiinnik sukaterinerput, qallikkut ilorlukkullu nammineernerulernitsinnik kinguneqanngisaannarsimasoq – nangillugu ingerlatsiniaannarneq.

Inatsisartut eqqarsaatissikkusuppagut kaammattorlugillu taama suleriaaseqarneq qimallugu, uagut inuiattut soqutigisagut, isumaqartitagut iluaqutissagullu uuttuutigalugit, inuiaqatigiinnik sukaterineq siunissami qaninnermi ataqatigiissagaasoq ingerlanneqalissasoq.

Suliffeqarnermi innersuussisarneq il. il. maleruaqqusat siunertai pingarnerit qissimikkaanni; tassalu inuit nunaqavissuusugut sulinikkut piginnaasatigut qaffassarneqarnissarput, tikisitanillu atuinerup annikillissarnissaa, Partii Inuit erseqqissumik oqariartuutigissavaa, anguniakkatut kusanartutut taaneqartut tamakkua oqaasiinnaammata piviusunik imaqqanngitsut.

Partii Inuit taama oqarnitsinnut tunngavigaarput, ukiorpassuannngortuni AMA aqqutigalugu ilinniaqqinnernut pikkorissarnernullu tapiissutit sakkugalugit ingerlanneqarsimmata. AMA tassaavoq tapiissuteqartarnermik aaqqiissuussineq suliffeqarnermut akitsuut aqqutigalugu aningaasalersorneqartoq.

Tassani Partii Inuit qularutiginnngilarput nunaqavissut inuppasuit AMA aqqutigalugu ilinniaqqinnernik pikkorissarnernillu ingerlatsinikuusut – ullumikkulli suliffissaaleqisorpassuit akornanni inatsisartunit, pisortaniillu inissisimatinneqartut.

Partii Inuit nalilersuinerput naapertorlugu, tassaavoq inatsisartoqarnikkut naalackersuinikkullu uagut inuit innuttaasutut soqutigisatta, ulloq manna tikillugu pimoorussamik malersorneqarusunnginnerinut takussutissaq erseqqilluinnartoq paatsuugassaannngitsorlu.

Avataanit suliartortut killilersimaarneqarnissaat pillugu aaliangersakkat qissimikkaanni, ingerlatseqatigiiffiit (kommunet) ilaatigut maleruaqqusamik eqqortitsiniarnerat unnersiutissaanngilluinnarpoq. Inatsit pineqartoq (tak. inatsit nr. 27, 30.10.1992'imeersoq) ullumikkut asuli assiliaataannaasutut ippoq, qallikkut uagut inuit nunaqavissut allaat sallertut sullinniarneqannginnitsinnut takussutissaalluni.

Ingerlatseqatigiiffiit nalunaarsukkaminnik apuussisarnissamik pisussaaffeqarnerat aallaavigalugu (tak. nalunaarut nr. 20, 19.11.2007'imeersoq), Partii Inuit naalackersuisumut



INATSISARTUNI

susassaqtumut apeqquteqaatigissallugu soqutiginantipparput, ullumikkut killiffipput sumiinnersoq;

- AMA aqputigalugu ilinniaqqissimasut pikkorissarsimasullu qanoq amerlatigippar?
- AMA aqputigalugu ilinniaqqissimasut pikkorissarsimasullu sutigut piginnaaneqarpar?
- AMA aqputigalugu ilinniaqqissimasut pikkorissarsimasullu qanoq atorneqarpar?
- AMA aqputigalugu ilinniaqqissimasut pikkorissarsimasullu tikisitat piginnaasaannut sanilliukkaanni, ilinniaqqissimasut pikkorissarsimasullu piginnaasaat qanoq inissisimappat?

Suliniutini angisuuni illuliortiternernik sanaartornernillu suliaassat pillugit aaliangersakkat (inatsit nr. 20, 19.11.2007'imeersaq) pillugit Partii Inuit naatsumik oqaatigissavarput, taaneqartoq aammaloortumik takussutissaammat qanoq ataqatigiinngitsigisumik qanorlu isumaqanngitsigisumik naalakkersuinikkut suliniuteqartugut.

Tassani nalunnigilarput ullumikkut suliffissaaleqisut amerligaluttuinnartut – illuatungaani uagut suliarisinnaasagut apeqqusiinnguarata allamiunut tunniussuullutigik. Partii Inuit isumarput naapertorlugu, sianiilliorneruvoq annertoq, inuiattullu immitsinnut suutinnginnerujussuatsinnut takussutissaq annernartoq allaat.

Taamatorluinnaq inissisimavoq *pisortat sinnerlugit suliariumannittussarsiuusisarneq pillugu inatsit* (tak. inatsit nr. 11, 2.12.2009'meersaq). Tassani suliffeqarfiit avataaneersut ammaanneqarput, uagut nammineq suliarisinnaasatsinnik tigooraanissaannut. Tassuunakkullu ilukku qallikkullu immitsinnut pilersorsinnaanerput mangiarneqarlunilusoq.

Minnerunngitsumik ilinniartoqartarneq eqqarsaatigalugu, Partii Inuit paasissallugu soqutigantippaat tamanna aqqissuussamik ingerlanersoq. Tassami suliffeqarfiit ilinniartoqartarnerat pingaarutilimmik inissisimammat – uagut nunaqavissut suliaasanik tigusiartuaarnissarput pimoorussimagutsigu.

Partii Inuit allannguutissatut siunnersuut sullugalutigu isumassaaleqitillutigulu, asulilu kusassaatitut piffissaajaataannartut nalilerlutigu, taasinermi akerliunissarput naatsersuutigaarput.

Taama oqaaseqarluta qujavugut.